

24 FEB 2003

NAM-PERKONGSIAN BIJAK/I

PERKONGSIAN BIJAK ANTARA TAJUK MENARIK PADA HARI TERAKHIR FORUM

PERNIAGAAN NAM

PETALING JAYA, 24 Feb (Bernama) -- Memupuk perkongsian bijak di dalam sektor utama ekonomi bakal menjadi antara tajuk menarik pada hari kedua dan terakhir Forum Perniagaan NAM (Pergerakan Negara-Negara Berkecuali) di sini.

Program pada sebelah petang forum perniagaan itu memperuntukkan satu sesi mengenai "Memupuk perkongsian bijak dan ikatan strategik berkesan di kalangan masyarakat perniagaan negara-negara Selatan."

Para penceramah termasuk Tan Sri Dr Omar Abdul Rahman, Pengerusi Perkongsian Komanwel bagi Pengurusan Teknologi (CPTM); Tan Sri Azman Hashim, Presiden Persatuan Selatan-Selatan Malaysia; Tan Sri Dr Ahmad Tajudin Ali, Pengerusi, Kumpulan Industri-Kerajaan Malaysia Bagi Teknologi Tinggi (MiGHT); K. Kesavapany, Pengarah Institut Pengajian Asia Tenggara, Singapura, Pyone Maung Maung, Presiden Dewan Perniagaan dan Industri Asean, Myanmar.

Pada lewat petang, akan diadakan selari sesi-sesi dan bengkel mengenai perkongsian bijak di dalam sektor utama. Ini termasuk tenaga dan infrastruktur, perusahaan kecil dan sederhana, teknologi maklumat dan komunikasi, pasaran modal dan kewangan, pelaburan terus asing/pembuatan, pelancongan dan penjagaan kesihatan/farmasi.

Forum perniagaan hari ini bermula dengan taklimat pelaburan negara di bawah tema "Menghubungkan jurang pembangunan, perniagaan dan digital -- bagaimana negara Selatan-Selatan dapat meluaskan kerjasama, urus tadbir global dan keupayaan menghadapi globalisasi. Malaysia diwakili di sini oleh Martin Khor, pengarah Third World Network, sebuah pertubuhan bukan kerajaan.

Sebelum menikmati makan tengah hari, beberapa pegawai kanan kerajaan dan pemimpin perniagaan akan membuat pembentangan di bawah tema "Membina semula persaingan, mengekalkan pertumbuhan ekonomi - satu model masa depan untuk bekerjasama dan pembangunan."

Tan Sri Dr Zeti Akhtar Aziz, Gabenor Bank Negara Malaysia, dan Dr Rozali Mohamed Ali, Pengerusi Commerce International Merchant Bankers Bhd, akan berucap pada sesi ini.

Lain-lain penceramah termasuk Rini Soewandi, Menteri Perdagangan dan Industri Indonesia; Tanri Abeng, bekas Menteri Perusahaan Milik Negara Indonesia yang kini Pengerusi Pusat Eksekutif bagi Kepimpinan Global; dan Dr A.C. Muthiah, Presiden Persekutuan Dewan Perdagangan dan Industri India, India.

Menteri Pertahanan Malaysia Datuk Seri Najib Tun Razak, akan berucap semasa makan tengah hari mengenai model pembangunan Malaysia dengan tumpuan ke atas "Pembangunan, keamanan dan kestabilan di sebuah negara pelbagai bangsa."

Semalam, Forum Perniagaan NAM telah mendengar ucapan oleh Perdana Menteri Malaysia Datuk Seri Dr Mahathir Mohamad, presiden Afrika Selatan Thabo Mbeki, presiden Indonesia Megawati Soekarnoputri, perdana menteri Thai Thaksin Shnavatra dan perdana menteri India Sri Atal Bihari Vajpayee.

-- BERNAMA

SHY SHY AHM